

ON TLAKATL IUAN ON ATINTLI

Se tlakatl okipix sen atintli. Yejua okijtoj:

—Nikalaktis on atintli ijtik sen botella niman niktomauas. Niman tla yoniktomau nixipeuas, niman ika on itlaken nikchijchius notampoltsin pampa sanoyej nikuelita.

Kemaj melauak okichijchiu itampoltsin. Niman sanoyej kualtsin okixtij.

Niman on itampoltsin okitsotsonato kampa iluipan. Ompa on tlakamej okuelkakilijkej, niman opeu kitlajtoltiaj:

—¿Tlen, yolki itlaken on yejuan ika otikchijchiu on motampoltsin?

Niman yejua okimijlij:

—On yolki sanoyej ueyi yolki.

In okijtoj pampa xkinekiya kimijlis on tlen melauak. Niman sanoyej opeu kitlajtoltiaj, okimijlij ika on itlaken on atintli. Niman yejua okimijlij:

—In sanoyej kuajli para ika nenkichijchiuskej nemotampoltsin. Achtopa xkalaktikan ijtik sen botella, niman xtlakualtikan sanoyej hasta kampa ma tomaui. Niman tla yotomau xxipeuakan. Niman ika on itlakentsin xchijchiuakan nemotampoltsin.

Niman on tlakamej okijlijkej:

—Ma timitskouilikan motampoltsin, niman tejua okse tikchijchius.

Niman yejua okiminnemakiltij sanoyej patiyo.

Yejua okajkayajkej pampa xok kaman okinextij okse itampoltsin yejuan kualtsin ken on yejuan kipiyya.

Ijkon tej, tlami icuento on tlakatl niman on atintli.